

**Zeitschrift:** Igl Ischi : organ della Romania (Societat de Students Romontschs)

**Herausgeber:** Romania (Societat de Students Romontschs)

**Band:** 74 (1989)

**Heft:** 1

**Artikel:** Il cavar fier en Tujetsch

**Autor:** Hendry, Tarcisi

**DOI:** <https://doi.org/10.5169/seals-881916>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 30.07.2025

**ETH-Bibliothek Zürich, E-Periodica, <https://www.e-periodica.ch>**

# I C A V E A L F E T U J E T S C H R N

La Ruosna da Paliz — in'antieriura mina da fier

T A R C I S I   H E N D R Y

La suletta aunc enconuschenta mina da fier ella Val Tujetsch secatta en Val Nalps da maun seniester dalla val ella costa dil Tgom. Da Pardatsch da stiarls, gest avon la Val blaua, indichescha il muossavia la direcziun viers il Tgom. Quella senda meina era tier la Ruosna da Paliz, l'antieriura miniera. Suenter in tschancun ualti stentus arriva ins a Paliz. Sisum il plaun da Paliz secatta in begl. Da leu va ei ussa seniester suenter in trutg tochen ad ina fontauna frestga che sgarguglia ord la greppa. Ussa mo aunc in tschancun encunter nord, ed avon il nas stat la bucca dalla ruosna al pei dalla Val stretga. La mina secatta sin ina altezia da 1875 ms.m.

La Ruosna da Paliz, aschia vegn ella numnada dils Tuatschins, ha adina giu sin mei ina certa calamita e svegliau las marveglias da perscrutar. — Gia sco pastur el mises da Pardatsch da stiarls hael fatg mias empremas perscrutaziuns. Mo nus buobs fuvan memia temeletgs, spir fantasias e cardientschas blauas. La tauna stgira leusi ella costa dil Tgom fageva impressiun, e nus

ughegiavan da seruschnar viaden tochen ch'ei vegneva stgir, stgiraglia e lu spert pu-spei returnar. En nos tganets imaginavan nus ils spérts, las siarps ed ils miezmiur e miezutschi che savessen sguilar neuado ed attaccar nus. En quei senn vevan era nos patrunz fatg pulit tema cun raquintar e stravagar cun empau diltut.

Denton il desideri d'inagada ir vjaden e perscrutar quei mund zappau el cuolm ei restaus. Ina mina da fier en quella altezia, en quei liug ha fascinav mei. La stad 1989 sedat anetgamein la pusseivladad da perscrutar da rudien l'entira anteriura mina. Igl ei stau ina aventura — in ir anavos en in temps värgau en in mund nunenconuschent. Quella mudesta, segir buca scientifica contribuziun ei il resultat dalla perscrutaziun, ensemen cun las retschercas en divers archivs e bibliotecas davart il cavvar fier en Tujetsch.

## Descripziun dalla mina

L'entrada ei pitgada ora en grep massiv, ed entuorn entuorn ves'in aunc oz las furadas cun puntgas da fier. Ina lavur admirabla, vegneva gie tut fatg a maun. Immediat suenter in per pass dat en egl da seniester l'annada 1697 ch'ei marclada ella greppaglia. Igl ir vinavon vegn ussa pli e pli grevs, ed ei dat nuot auter che semetter en schanuglias. La ruosna sesiara anetgamein e va ad ault. Mo da star en venter e seruschnar sc'ina talpa vegn ins ussa vinavon, e senza glisch fuss ei da far nuot. Mo anetgamein suenter quels diesch meters semida



la situaziun, ed avon ins sesarva ina termenta ruosna. Igl ei pressapauc sco dad esser en ina pintga stanza cavada ora el cuolm. Ensi egl ault in altezia tgamin ch'ei zacu daus afuns ed ha aschia stuppu l'entira entrada. Buca nunprigulus, pertgei egl ault ein sepustai entgins craps per dar afuns. La direcziun agraden ei ussa interrutta entras quei material ch'ei zacu daus afuns. Da supponer eisi che la ruosna principala cuntnueschi en quella direcziun. La detga raquenta gie, che sch'ins mondi tochen entadem la ruosna, audien ins a tuccar da miezdi a Rueras, priu il cass ch'ei seigi secapescha las endisch. Denton, da maun dretg semuossa ina nova ruosna. Ins sa passar vinavon sidretg ni mo lev ellas schanuglias. Ei aulza levamein. Tscheu e leu ein francai vi e neu len-


na ella ruosna per tener a mistregn il grep. Suenter circa siat otg meters ei quella ruosna a fin. Enasisum aunc ina pintga menada a seniester. Leu el profund secatta in igniv d'in animal che ha zacu anflau cheu siu refugi e dormitori. Egl ault dano-vamein in tgamin d'entgins meters cavaus ora dils minaders per encurir il mineral. Dalla ruosnuna cul tgamin prigulus meina ina secunda ruosna en direcziun Cuolm Nalps viaden el cuolm. Puspei aulza ei cuntnuademein levet. Suenter in tschancun da tschun meters puspei in tgamin egl ault e suren ina ruosna en'in'autra direcziun. Duas ruosnas, ina cuntnuescha la direcziun prida e l'autra va pli ad ault. La ruosna suren passa gest sur la principala ora e suenter in tochet vegnan ellas pu-spei ensemene. Ussa aunc in tschancun che aulza pulit e la fin ei cuntonschida. Da-pertut secattan dretg e seniester ulteriu-ras ruosnas pli pintgas e grondas. Alla fin in tgamin ualti ault siaden el cuolm. Ils mi-niers han per saver luvrar meglier con-struiu egl ault in plantschiu da lenn. Da-pertut ein d'anflar lenna che sprunava e teneva a mistregn la greppa duront il temps da lavur.

#### Explotaziun da fier ella Cadi

Las empremas enconuschentas minas da fier dalla Cadi secattan ella Val Medel. Igl onn 1366 ein quellas documentadas l'em-prema gada. Igl avat Jakob da Planaterra surdat per l'explotaziun las minas ad interessents da Lucerna, Uri, Schwyz ed

Ruosna da Paliz

Skizza dalla mina a Paliz



Unterwalden per in tscheins annual. Carteivel vegneva cavau leu il mineral da plum cun argien. Perdetga dallas minieras en Val Medel dat oz sulettamein igl uclaun Fuorns che muossa ora l'existenza dils fuorns da cular fier.

Avat Bundi dispona 1609 dallas minieras a Trun ed en Val Medel.

Il territori dalla Cadi s'udeva lezs onns alla claustra da Muster. Ils dretgs d'explotar mineralias possedeva secpescha la claustra. Aschiditg sco la claustra administrava lur possess tut suletta surdava ella per l'explotaziun encunter in tscheins annual. Aschia ei quei schabegiau lezs onns cun las minas da fier da Punteglia, Medel, Nalps e Curnera. Suenter diversas cunveziuns e dispetas da 1643 e 1648 denter claustra e cumin, surpren quel suenter haver survegniud apli libertads da concessiunar minieras, e la claustra haveva resalvau per ella entgins dretgs. Dapi lu ha il cumin concediu ils dretgs d'explotaziun als interessents.

1659 surdat il cumin ed igl avat e convent las minieras dalla Val Sumvitg per 10l onn al sechelmeister da cumin Benedikt Cotrin encunter in tscheins annual per l'explotaziun.

1694 vegnan las minas da Punteglia sur Trun affittadas entras igl avat da Muster ed il cumin a Johann Ulrich Steiner da Winterthur. Cun pauc success vegnan las medemas minas puspei schadas vi igl onn 1752. La davosa gronda cavada da fier a Punteglia ha giu liug ils onns 1818 tochen 1864.

## En Tujetsch

---

L'emprema indicaziun documentada datetsha digl onn 1658. Quei onn affittechan la claustra ed il cumin tut las minas da fier en Tujetsch a bandierel Duri Soliva per 10l onn per in tscheins annual. Da tgei minerals ei retractava ei buca remarcau, carteivel dil mineral da plum (Bleiglanz). Sto esser che quei mineral fuva lezs onns fetg tschercaus. Savens secatta en minas da plum era il custeivel e pli tschercau argien. En in auter liug vegn era fatg valer ch'ei savessi esser stau ina explotaziun d'aur. Remarcabel, avon la ruosna ein strusch d'anflar indicaziuns da metal. Insumma eisi da smarvegliar co ins ha antruras gest anflau per bien da cavar en quei liug. Sto esser ch'igl interess d'explotar fier fuva gronds ed era umens capavels e versai savevan far las necessarias indicaziuns. Apli informaziuns davart il metal explotaus savess ina analisa entras in geolog porscher.

Carteivel fuva gia avon igl onn 1658 vegniu explotau fier — tgunsch entras glieud dalla bassa, pertgei il sura document plaida gie da minas da fier gia existentas. Forsa vegneva gia el 14avel tschentaner explotau fier en Tujetsch, lezs onns vegneva cavau e luvrau ellas minas dalla Val Medel. Interessant ei era ch'ei stueva exister pliras minas tenor il document d'affittaziun. Nua, gliez ei buca d'eruir exact.

Sulettamein en in auter liug vegn fatg attents sin l'existenza dil mineral da plum si Tgatlems. Plinavon plaida pader Placi a Spescha da minas ella Val Curnera.

Il plaid fuorns ei vasts e sa ver pliras muntadas. Inaga ils fuorns d'elavurar, da cular il fier, lu vegnevan era las minas e minieras savens numnadas fuorns, ed era ils loghens da cristallas vegnan enconuschen-tamein numnai fuorns. Perquei eisi oz grev da giudicar tgei ch'il plaid fuorn el document da 1658 munti per propi.

Alla entrada, sco gia sura allegau secatta l'annada 1697. Buca 1679 sco remarcau en pliras publicaziuns. Quei vul dir ch'ins hagi luvrau da 1658 tochen 1697 e vinavon. Sch'ins ha gia giu luvrau avon dat quei circa in temps da lavur da varga 60 onns. Quei rinforzescha il meini che la mina stoppi esser in bien ton pli gronda. Indicaziuns pertucont la vegliadetgna dalla miniera dat tan ulteriuramein la lenna, ils pals da sustegn e rinforzament egl intern dalla mina. In labor per dataziuns ha intercuretg in pal da rinforz e constatau che tal dateschi digl onn 1648.

Tgi ei quei Duri Soliva staus che ha surpriu l'explotaziun dalla mina da Paliz? Ils Solivas ein derivonts dalla Val Medel ed ein documentai dapi il 17avel tschentaner en Tujetsch. 1655 vegn el enconuschents sco fundatur da s. Onna a Camischolas. El fuva segiramein in um beinstont. Perquei daventa el era bandierel da cumin. In uffeci fetg tschercaus da lezs onns, vegneva il bandierel gie elegius per veta duronta. Pil pli duvrava ei secapescha era ina dètga buorsa per daventar possessur dil secund ault uffeci da cumin suenter il mistral. 1799 paga Gion Mudest Pali da Medel 400 flurins (ca. 680.— fr.) per daventar bandierel. Sco bandierel stueva el engirar ab-

soluta fideivladad. El veva da ver quitau dalla bandiera da cumin e purtar quella ell'uiara. La resca fuva gronda da piarder la veta. Las pretensiuns seclamavan suandontamein: veva il bandierel da piarder il maun dretg, stueva el purtar vinavon cul seniester. Vegneva quel blessaus, lu cun las combas. Fagevan quellas buca pli il survetsch, lu cun la bucca!


Pader Flurin Maissen fa 1974 la suandonta remarca pertuccont la mina da Paliz: En Val Nalps setracta ei d'ina stolla da 12 meters. Avon stolla hai jeu anflau rests da crappa cul mineral da plum (Bleiglanz). Quella dat perdetga dalla preschientscha dalla mina numnada els documents claustrals.

### La lavur el cuolm

---

Per ordinari vegneva luvrau duront la stad e viaden egl atun. La primavera existeva in memia grond prighel d'aua, pertgei aunc oz meina la ruosna temps da plievgia e marschauna aua. Igl unviern naturalmein exista en quei liug grond prighel da lavinias. La stolla viaden el cuolm vegneva se capescha cavada ora a maun cun puntga e mogn. Per sluccar il crap massiv e dir vegneva fatg fiug e silsuenter schau sferdental giu. Quei ei succediu tuttavia alla entada dalla ruosna che muossa ora in grep fetg massiv. Suenter dudisch meters semida il grep e daventa pli loms e levs da luvrar. Ils miniers han luvrau suenter las aveinas da plum, ein semenai dretg e seniester, i egl ault, anavon ed anavos. Per

tener a mistregn il grep vegneva francau cun pals ch'ein aunc oz per part veseivels ed en funcziun. La lavur el cuolm era segir buca maneivla e fetg stentusa culs primitivs uaffens da lezs onns. Suenter l'explo-taziun ord il cuolm suandava la meins leva lavur dil transport al plaz d'elavuraziun.




La lavuraziun dil mineral da fier

Gest dalla Ruosna da Paliz agradgiu, alla riava di Rein da Nalps secatta in liug che vegn numnaus ils Falluns. Pli probabel vegneva il mineral da fier menaus dalla mina sintargliuns dallas teissa spundas da Paliz giuado tochen als falluns. Leu vegneva il crap luvraus e tractaus vinavon. Ils falluns manizzavan cun agid dalla forza d'aua il

crap che cunteneva il custeivel metal. Pli navon vegneva il prezios crap lavaus e sortius — ina lavur che vegneva era fatga da femnas ed affons. Magari entiras famiglias che luvravan vid l'explotaziun da fier, il bab se capescha sco minier ella stolla. Schebein il fier vegneva éra culaus en quei liug, gliez ei grev da dir. Ils plazs da cular vegnevan adina puspei disloccai en auters loghens, pertgei quella lavur duvrava grondas quantitads la lenna. En scadin cass fuva il crap manizzau e lavau pli sempels da transportar vinavon e forsa cular en in auter liug.

In mussament dalla lavuraziun dil mineral da fier ei da cattar allas rivas dil Rein dalla Val Gierm. Gest sper la tschaffada d'aua entras l'Ovra electrica Reinanteriur, sper la via veglia che meina a Cavorgia-sura ein d'anflar crustas da metal. Existeva cheu inagada in fuorn da fier? Igl onn dalla construcziun dalla via viers las Cavorgias e duront l'erecziun dalla tschaffada ein plirs vegls mirs vegni destrui. Mirs sils quals plontunas fuvan carschidas culs onns. Aunc oz ein d'observar leu damaneivel egl uaul plirs suloms vegls ch'ein medemamein carschi en cun pegnuns. Pia perdetgas dall'esistenza da plirs baghetgs, forsa era fuorns da cular fier. Vegneva il mineral da fier da Paliz culaus cheu? Forsa pervia dalla lenna che fuva cheu en abundanza? Ins sa schizun tschenttar la damonda, schebein il fier anflaus ella Val Medel vegneva culaus ensemen cul fier da Tujetsch en quest liug.

Da quei temps vegneva il fier culaus en fuorns aviarts e cavai en ella tiara. Cun far



fiug e scaldar la crappa culava il metal ord il crap e serimnava el funs dil fuorn. Suenter schar sferdentar vegneva quel rimnaus e

daus vinavon per l'elavuraziun als fravis. Plitard ein ils fuorns cun fol tratgs entras la forza d'aua vegni en moda.

## Conclusiun

---

La mina da Paliz ei stada da plitost pintga muntada per l'explotaziun da fier ella Cadi. Segir ha ella buca furniu grondas quantitads da plum. Da lezs onns era il plum denton fetg tschercaus e pagava in bien prezi. Aschia han ils explotaders buca temiu las stentas e breigias. Era ei la dimensiun dalla ruosna pintga, cumparegliau cun outras minieras en nies cantun. All'entschatta dil I8avel tschentaner ei l'explotaziun ida a fin e la ruosna en emblidanza.

Oz dat ella a nus perdetga da temps vargai che nus carstgauns moderns vein pil pli miseria da capir.